

ANG CRISTOZHANONG KINABUHI, ANG IGLESIAHANONG KINABUHI ANG PAGKAHINGPIT SA PANAHO, UG ANG PAG-ANHI SA GINOO

(Sabado—Unang Sesyon sa Buntag)

Mensahe 4

Magmatinumanon sa Pag-alagad diha sa Tahas sa Ginoo ug sa Iyang Mga Gasa alang sa Iyang Ikaduha ug Nagkaduol na nga Pag-anhi

Basahong Kasulatan: Mat. 24:45-51; 25:14-30

- I. Gipadayag sa Mateo 24:45-51 nga magmatinumanon gyod ta sa pag-alagad diha sa tahas sa Ginoo sa paghatag nato sa Dios ingon nga kalan-on sa mga sakop sa Iyang panimalay aron mabatonan nato si Cristo isip ganti nato sa moabot nga gingharian:**
- A. Ang Dios dunay panimalay ug pagdumala sa panimalay, pamatigayon, nga ipaambit ang Iyang Kaugalingon nga kalan-on sa mga sakop sa Iyang panimalay aron mapadayag Siya—1 Tim. 1:4; 3:15; Efe. 2:19.
 - B. Nagpahamutang ang Dios og matinumanon ug mabuot nga mga ulipon sa Iyang panimalay isip mga tigdumala niini, mga piniyalan, mga palagianan sa sangkap, nga mohatag sa Iyang katawhan og kalan-on sa gitudlong panahon—Mat. 24:45; 1 Cor. 9:17; Efe. 3:2; 1 Cor. 4:1; 1 Ped. 4:10; Fil. 1:25.
 - C. Ang *mohatag nilag kalan-on* nagpasabot sa pagpangalagad sa pulong sa Dios ug ni Cristo isip sangkap sa kinabuhi sa mga magtutuo diha sa iglesia; si Cristo nga Espiritung taghatag-og-kinabuhi maoy atong kalan-on, nga gipakalawas ug maamgohan diha sa pulong sa kinabuhi—Mat. 24:45; Juan 6:57, 63, 68; Buh. 5:20; 1 Juan 5:16:
 - 1. Aron makapahimulos ta sa Ginoo nga espirituhanong kalan-on nato ug makapakaon sa uban, moampo ug mamalandong gyod ta sa Iyang pulong, motilaw ug mopahimulos niini sa paghunahuna pag-ayo niini—Efe. 6:17-18; Sal. 119:15; Ezeq. 3:1-4.
 - 2. Igahin gyod nato ang atong kaugalingon sa pag-ampo ug pagpangalagad sa pulong—Buh. 6:4; 2 Cor. 3:6, 8; Juan 7:37-39; itandi sa Heb. 7:25; 8:2.
 - D. Ang pag-ingon sa atong kasingkasing nga malangan pa ang atong Agalon paghigugma man sa daotang panahon karon ug dili paghigugma sa pagtungha sa Ginoo—Mat. 24:48; 2 Tim. 4:8, 10; itandi sa Buh. 26:18:
 - 1. Magbantay gyod ta sa pagkahangol, dili magtigom og bahandi alang sa atong kaugalingon kondili madato hinuon ngadto sa Dios—Luc. 12:16-21; 2 Cor. 6:10; Efe. 3:8.
 - 2. Nagpasabot ang “hinumdomi ang asawa ni Lot” (Luc. 17:32) nga dili gyod nato higugmaon ug mahalon ang daotang kalibotan nga hukman ug hingpit nang laglagon sa Dios; seryosong pasidaan kini alang sa mga magtutuong nahigugma-sa-kalibotan—vv. 28-32; itandi sa Rom. 1:21, 25.
 - 3. Magmatukawon gyod ta ug mangamuyo aron dili kalit nga moabot nato sama sa lit-ag ang adlaw sa pag-anhi sa Ginoo—Luc. 21:34-36; itandi sa Mat. 2:3.
 - E. Ang pagpamunal sa atong mga masigka-ulipon pagpanagmal man sa mga isigka-magtutuo nato—24:49; Buh. 9:4:
 - 1. Dili gyod ta mohukom ug manaway sa mga isigka-magtutuo nato; magma-lulot hinuon ta nila, magmalumog kasingkasing, mopasaylo nila, maingon

- nga gipasaylo ta sa Dios diha ni Cristo—Luc. 6:37; Efe. 4:31-32; itandi sa 1 Tes. 5:14.
2. Dili gyod ta moyubit o manaway ba sa atong mga igsoon; isipon hinuon nato sila nga labi pa kamaayo nato—2 Tim. 3:1-2; 1 Ped. 3:8-10; Jud. 10; 1 Cor. 6:9-10; Fil. 2:2-4, 29; Rom. 12:3:
 - a. Ang pagyubit kana mang gipaantos nato sa kasakit o gisamaran ba ang mga balaan sa grabe gyong pagdaot ug pagsaway nato kanila sa mapasipad-ong pinulongan.
 - b. Ang paagi sa Ginoo pagbaat man sa atong mga samad (pag-ayo kanato) ug pagbubog lana ug bino sa atong mga samad (paghatag sa Espiritu Santo ug sa diosnong kinabuhi kanato)—Luc. 10:33-34.
 - c. Ang usa sa mga hinungdan nga nabahin ug nadaot ang iglesia kana mang naay mayubitong mga pulong; ang mga nidawat sa mayubitong mga pulong pareho rag tulubagon sa mga namulong niini; aron mamintinar sa iglesia ang pagkausa, mobarog gyod ta batok sa mayubitong mga pulong.
 - d. Ang pagkamatikod nato sa sala naggikan sa pagkaila nato sa Dios; maingon man sab, ang pagkamatikod nato sa mayubitong mga pulong naggikan sa pagkaila nato sa Lawas; supak sa panghimatuod sa Lawas ang mayubitong mga pulong.
 - e. Gipasidan-an ta sa Ginoo nga ang mga mayubiton dili makapanunod sa gingharian sa Dios sa sunod nga panahon isip ganti sa madaogong mga balaan—1 Cor. 6:10.
 3. Dili gyod ta magharihari sa mga isigka-magtutuo nato; moalagad hinuon ta nila ingog mga ulipon aron pakan-on sila sa nabanhawng Cristo nga Espiritung taghatag-og-kinabuhi—1 Ped. 5:3; Mat. 20:25-28; itandi sa Num. 17:8.
- F. Ang pagkaon ug pag-inom uban sa mga palahubog pagpakig-uban-uban man sa mga tawong kalibotanon, nga nahubog sa kalibotanong mga butang—Mat. 24:49; itandi sa Efe. 5:18:
1. Tungod sa ilang diosnong kinaiya ug balaang posisyon, dili gyod angay masangonan pag-usa sa mao rang yugo ang mga magtutuo ug mga dili magtutuo; iaplikar gyod kini sa tanang suod nga relasyon tali sa mga magtutuo ug mga dili magtutuo, dili sa kaminyoon ug sa negosyo ra—2 Cor. 6:14; 1 Cor. 15:33; itandi sa Prov. 13:20.
 2. Mokalagiw gyod ta sa mga pangibog sa pagkabatan-on ug magtinguha sa malangkobon-sa-tanan nga Cristo uban sa mga nanawag sa Ginoo gikan sa putling kasingkasing—2 Tim. 2:22.
- G. Magantihan ang matinumanon ug mabuot nga ulipon sa pagbulot-ang magbuot inigpadayag sa gingharian, samtang mabulag ang daotang ulipon sa mahimayaong Cristo, sa himaya sa Iyang gingharian, ug sa mahimayaong presensya Niya sa Iyang gingharian—Mat. 24:47, 51.

II. Gipadayag sa Mateo 25:14-30 nga magmatinumanon gyod ta sa pag-alagad diha sa mga gasa sa Ginoo aron makaginansya ta alang Niya ug makasulod sa kalipay sa Ginoo sa moabot nga gingharian:

- A. Gipakasama sa Ginoo ang Iyang Kaugalingon sa tawong moadto na sa laing nasod (sa mga langit) ug nitugyan sa iyang katigayonan sa iyang mga ulipon; nagtimaan ang *iyang katigayonan* sa iglesia (Efe. 1:18) lakip na ang tanang magtutuo, nga nag-umol sa panimalay sa Dios (Mat. 24:45).
- B. Sa usa sa iyang mga ulipon gihatag niya ang lima ka talanton, sa usa pa duha, ug sa usa pa gyod usa—sa matag usa sumala sa kaugalingon niyang kahi-moan—25:15:

1. Nagtimaan ang mga talanton sa espirituhanong mga gasa (espirituhanong mga kahanas ug kahimoan)—Rom. 12:6; 1 Cor. 12:4; 1 Ped. 4:10; 2 Tim. 1:6.
2. Ginasahan ang tanang bahin sa Lawas ni Cristo, ug gasa ang tanan—Rom. 12:6; Efe. 4:7-8.
3. Nagtimaan ang *kaugalingong kahimoan* sa natural natong kahimoan, nga inu-mol sa paglalang sa Dios ug sa nakat-onan nato—Mat. 25:15; itandi sa Buh. 7:22:
 - a. Magmapuslanon ang natural nga kusog ug kahimoan diha sa pagkaban-haw alang sa pag-alagad nato sa Ginoo aron mahimo tang mga haligi ug mga tigtukod og haligi aron matuman ang walay kataposang tuyo sa Dios—1 Cor. 15:10, 58; itandi sa 2 Cor. 6:1-2; 1 Hari 7:13-22 ug mga nota; Efe. 4:8, 11-12, 16; Gal. 2:9; Bug. 3:12.
 - b. Niagi sa krus ang natural nga kahimoan ni Moises, Pedro, ug Pablo ug nigula sa pagkabanhaw aron magamit sa Ginoo alang sa pagtukod sa Iyang Lawas—Bug. 7:22-36; Luc. 22:32-33; 1 Ped. 5:5-6; Buh. 22:3; Fil. 3:5-8, 14; Gal. 2:20; 2 Cor. 4:10-12; 2 Tim. 2:11.
- C. Nagtimaan ang gipatigayon ang mga talanton nga gigamit ang gasa nga gihatag sa Ginoo kanato; nagtimaan ang nakaginansyag lain pang mga talanton nga gi-hurot gyog gamit ang gasa nga nadawat nato sa Ginoo kutob sa mapuslan niini, nga walay nawala o nausik—Mat. 25:16-17; 1 Tim. 4:14; 2 Tim. 1:6; 4:5.
- D. Lahi sa dunay lima ka talanton ug duha ka talanton, nilakaw ang usa ray ta-lanton, nikalot sa yuta, ug gitagoan ang salapi sa iyang agalon; nagtimaan kini nga wala gamita ang gasa sa Ginoo aron moluwas sa mga tawo ug mangalagad sa Iyang kadato kanila—Mat. 25:18, 27:
 1. Nagtimaan ang yuta sa kalibotan; busa, nagtimaan ang *nikalot sa yuta* og nalambigit sa kalibotan aron ilubong ang gasa nga nadawat nato sa Ginoo.
 2. Nagtimaan ang *gitagoan ang salapi sa iyang agalon* nga gipakawalay-pulos ang gasa sa Ginoo, giusik-usikan kini sa yutan-ong mga pagpangulipas; bisan unsang pagpangulipas nga dili mogamit sa gasa sa Ginoo pagtago man niini.
- E. Giingnan sa agalon ang daotan ug tapolang ulipon nga gideposito unta niya ang salapi sa iyang agalon sa mga tig-ilis og salapi (mga bangkero) ug sa pag-abot niya, mabawi unta niya ang iyaha nga dunay tubo—v. 27:
 1. Sa usa ka bahin, makaingon ta nga ang mga tig-ilis og salapi (mga bangkero) mao ang tanang bag-ong magtutuo, mga batan-on, ug mga nanibog; ang labing maayong paagi nga magamit nato ang atong talanton pag-atiman man sa uban, maikag ug magtagad nila aron ikapaambit si Cristo kanila.
 2. Sa mogugol tag panahon uban sa Ginoo ug mobukas Kaniya kon kinsay atimanon nato, luwanan ta Niya; sa mokontak ug makig-ambitay ta sa uban sa pagkausa nato sa Ginoo sa pagpangga kanila sa Iyang presensya ug pagtil-og kanila sa Iyang kadato, diha-dayon magamit nato ang atong talanton.
 3. Unya inig-anhi sa Ginoo, mabawi Niya ang Iyaha nga dunay tubo isip gi-nansya nato alang sa buhat sa Ginoo sa paggamit nato sa Iyang gasa.
- F. Inigbalik sa Ginoo, makighusay Siya nato; nagtimaan kini sa paghukom sa Ginoo sa Iyang hukmanan (2 Cor. 5:10; Rom. 14:10) sa kahanginan (sulod sa Iyang parousia) ug didto hukman ang pagkinabuhi, paggawi, ug buhat sa mga magtutuo alang sa ganti o silot (1 Cor. 4:5; Mat. 16:27; 25:19; 1 Cor. 3:13-15).
- G. Ang ganti sa Ginoo walay kalabotan sa gidak-on ug gidaghanon sa atong buhat kondili sa pagkamatinumanon nato sa paggamit sa Iyang gasa kutob sa ma-puslan niini; si Cristo mismo unya ang atong purongpurong sa kinabuhi, pu-rongpurong sa pagkamatarong, ug purongpurong sa himaya isip ganti nato aron makapahimulos ta sa moabot nga gingharian—Mat. 25:23; Bug. 2:10; Sant. 1:12; 2 Tim. 4:8; 1 Ped. 5:4).

H. Sa moabot nga gingharian kuhaon ang gasa sa Ginoo gikan sa tapolang mga magtutuo, ug itambog sila sa kangitngitan sa gawas, apan madugangan ang gasa sa matinumanong mga magtutuo, ug mosulod sila sa kalipay sa ilang agalon (Mat. 25:21, 23); ang makaambit sa kalipay sa Ginoo maoy kinadak-ang ganti, mas maayo pa sa himaya ug posisyon, diha sa gingharian—vv. 21, 30.